

Ala xa masenyi
Annabi Pɔlu naxan seɓe Tito
ma
Masenyi nde yi Kitaabui xa
fe ra

Yi Kitaabui findixi bataaxe nan na Ala xa xɛera Pɔlu naxan seɓe danxaniyatɔe nde ma naxan nu xili Tito. Girekika nan nu a ra naxan nu kafuxi Pɔlu ma Ala xa wali kui.

Pɔlu yi bataaxe seɓe a ma temui naxe, Tito nu na Kireti. Kireti findixi suri nan na naxan na Miditerane baa tagi. Pɔlu nun Tito nu bara siga Kireti kawandi tide, Pɔlu fa Tito lu naa a xa na danxaniyatɔe jamae mali e xa senɓe soto. Pɔlu yi bataaxe seɓe ne Tito ma a xa marasi nun limaniya fi a ma alako a fan xa Kireti danxaniyatɔe rasi, a e ralimaniya, a nɔndi makenen e be.

Yi Kitaabui fe gbege masenma won be danxaniya nun danxaniyatɔe jama xa fe ra. A a masenma a won sese mu noma kiside won ma wali fanyie saabui ra. Kisi sɔtoma Ala xa hinne nan tun saabui ra. Xa won bara danxaniya, won bara kisi, won fe birin nabama ne fa alako won jere ki xa tinxin, won xa wali fanyie suxu.

Ala xa yi Kitaabui xa masenyi rasabati won boɓe kui. Ala xa won mali won ma danxaniya xa tilin, won ma wali fanyie xun xa masa. Amina.

Ala xa masenyi
Annabi Pɔlu naxan seɓe Tito

ma

Xεεbui

¹ N tan Pōlu nan yi ki, Ala xa konyi nun a xa Mixi Sugandixi Isa xa xεεra. N na walife alako Ala xa pama sugandixi xa danxaniya, e man xa nōndi kolon naxan e rapεrema Ala xa fe kui. ² Yi danxaniya nun yi nōndi a niyama nε mixi xa a xaxili ti Ala xa kisi ra. Ala, naxan xa laayidi mu kanama, a tan nan yi abadan kisi laayidi won bε beenun dunija xa daa. ³ Waxati to kamali, a naxa a xa xibaaru fanyi makenen kawandi saabui ra, naxan bara taxu n na Ala won Nakisima xa yaamari ma.

⁴ N bara i tan Tito xεebu, naxan bara findi n ma di yati yati ra won ma danxaniya kui. Baba Ala nun a xa Mixi Sugandixi Isa, won Nakisima xa hinne nun bōpεsa fi i ma.

Tito xa wali Kireti danxaniyatōε pamae tagi

⁵ N bara i lu Kireti alako i xa fee yailan naxee yailan daaxi luxi na, i xa mixie sugandi taaε birin kui, e xa findi na danxaniyatōε pamae xa kuntigie ra. Alo n i yamari ki naxε, ⁶ danxaniyatōε pama kuntigi lanma nε a xa findi tinxintōε ra xili fanyi na naxan xun, gine keren kanyi, naxan xa die danxaniyaxi, mixie mu naxee kolon kalabante xurutaree ra. ⁷ Fo yi xunmatie xa findi xεmε tinxinxie nan na barima Ala xa wali nan taxuxi e ra. E naxa findi mixie ra naxee e yεte igboma, naxee bōpε tema mafuren, naxee siisima, naxee mawolen, naxee biraxi geeni tinxintare fōxō ra. ⁸ Fo e xa findi xεmεε ra naxee fata xōpε rasεnεde, fe fanyi rafan naxee

ma, naxee e yete xaninma xaxilimaya ra, naxee tinxin, naxee seniyeɓ, naxee noxi e yete ra. ⁹ Fo nɔndi masenyi xa lu e yi ra alo e xaranxi a ra ki naxe. Na nan a toma e fan noɓa kawandi tide a nɔndi ki ma, e man no na nɔndi matandie ra.

¹⁰ Na matanditi mooli gbegebe na na, a gbengbenyi sunna mixie ya ma. E de wuya, mixi yanfafe rafan e ma. ¹¹ Fo won xa e de balan. E bara denbaya ndee kana, barima e na e xaranfe fee nan na naxee mu daxa. E na birin nabama e yete xa geeni tinxintareya nan ma fe ra. ¹² E xa namijonme nde nan yati a fala, «Kiretikae wule nun e furi nan tun kolon. E tunnaxono, e man jaaxu alo boximase.» ¹³ Nɔndi nan yati na a ra. N na a falafe na nan ma, i xa woyen e ma a xoroɓe ra alako e xa danxaniya a fixe ra, ¹⁴ e xa ba Yuwifi xa kuye taalie danxunfe. E xa ba mixie xa yaamarie danxunfe naxee bara meɓ nɔndi ra. ¹⁵ Se birin seniyeɓ seniyeɓtaree be, kono sese mu seniyeɓ seniyeɓtaree nun danxaniyataree tan be. E xaxili nun e sondonyi birin bara manɔɓo. ¹⁶ E Ala kolonfe falama e de ra, kono e xa wali a masenma a e mu a kolon feo! E xa fefe mu fan. Seriyɓ matandie nan e ra, naxee mu noɓa wali fanyi yo rabade.

2

Danxaniyatɓe xaranfe nɔndi ra naxan jere ki masenma e be

¹ Kono i tan xa nu danxaniyatɓe xaran nɔndi masenyi nan na.

² I xa a masen xemoxie be e xa taxasi, e xa jere a binyamixi ki ma, e xa e yete xanin xaxilimaya

ra, e xa bira nɔndi nan fɔxɔ ra e xa danxaniya kui, xanunteya kui, a nun tunnabɛxiya kui.

³ Na kui, i man xa a masen ginɛ mɔxie bɛ, e xa jɛrɛ seniyenyi kui, e naxa findi mixi mafalɛe ra, e naxa siisi. E xa nu marasi fanyɪ fi ⁴ sungbutunyie ma alako e xa e xa mɔrie nun e xa die xanu. ⁵ E man xa e rasi e xa e yetɛ xanin xaxilimaya ra, e xa seniyen, e xa banxi walie suxu, e yuge xa fan, e xa e yetɛ magoro e xa mɔrie bɛ, alako Ala xa masenyi naxa bɛxu.

⁶ I man xa sɛgetalae fan nasi e xa e yetɛ xanin xaxilimaya ra ⁷ fe birin kui. I tan yetɛ xa findi misaali ra e bɛ i xa wali fanyie saabui ra. I xa kawandi xa findi nɔndi nun sɔɔbɛ ra. ⁸ I xa masenyi xa tinxin, alako i matandimae xa yaagi, barima e mu fefe kobi kolon e naxan falama won ma fe ra.

⁹ I xa a masen konyie bɛ, e xa e yetɛ magoro e marigie bɛ fe birin kui. E xa e rapɛlɛxin, e naxa e matandi, ¹⁰ e naxa sese mupa, e xa a masen a e marigie nɔma lade e ra ki fanyɪ. Na konyi mɔɔli binyɛ fima nɛ won Nakisima Ala xa masenyi ma fe birin kui.

¹¹ A lanma won xa jɛrɛ yi mɔɔli ra barima Ala xa hinne bara makenɛn, naxan nɔma findide kisi ra mixi birin bɛ. ¹² A xa hinne won xaranma alako won xa gbilen tinxintareya nun dunɪja fee fɔxɔ ra, won xa won yetɛ xanin xaxilimaya ra, won xa won ma dunɪjɛigiri rapɛrɛ tinxinyi nun Ala yaragaaxui kui. ¹³ Won to na yi dunɪja ma, won na fe fanyɪ nan mamɛfe won xaxili tixi naxan na. Won na Ala xa Mixi Sugandixi Isa xa nɔrɛ nan mamɛfe, won Nakisima Marigi Ala.

¹⁴ A tan nan a yete fi won be, alako a xa won xunsara won ma yunubie xa fe ra, a xa nana nde rasenyen e xa findi a yete gbe ra, naxee senbe soxi wali fanyie rabafe ma.

¹⁵ I xa mixie kawandi yi fee ra. I xa mixie ralimaniya. I xa e rasi. I xa nondi makenen e be i senbe birin na. Mixi yo naxa yo i ma.

3

Isayanka jere ki

¹ I xa e ratu, e xa e yete magoro mangee nun mangasanyi be, e xa e xa yaamarie suxu. E xa gbata wali fanyi mooli birin nabafe ra, ² e naxa mixi yo mafala, e naxa gere so, e xa marafanyi nun boje fanyi masen birin be.

³ A singe won fan nu daxupa nan nabama. Yaamari matandimae nan nu won na. Won nu bara loe kira xon. Won nu bara bira won yete waxonfe foxo ra a nun dunja fe mooli birin foxo ra, han na nu bara won findi konyie ra. Won nu won ma dunja xaninma naaxupa, toone, gbesenxonnanteya, nun maraaxupa nan kui. Won fan mu nu rafan mixie ma.

⁴ Kono won Nakisima Ala to a xa boje fanyi nun a xa xanunteya makenen, a naxa kisi fi won ma. ⁵ A mu won nakisixi won ma wali fanyie xa fe xa ma, a won nakisixi a xa kinikini nan ma, won xunxafe ye xora a nun a Xaxili Seniyenxi saabui ra. Na bara a niya won xa bari a neene ra, won ma dunjeigiri birin xa masara. ⁶ Ala bara won ki! A bara a Xaxili Seniyenxi ragoro won ma won Nakisima Isa saabui ra.

⁷ Na kui, won ma yunubie to bara xafari a xa hinne saabui ra, won bara nɔ findide ketongoe ra, won bara won xaxili ti abadan kisi ra. ⁸ Nɔndi masenxi nan na ki. A xoli n ma i xa na fee masen a fanyi ra, alako naxee bara danxaniya Ala ma, e xa fe birin naba alako e xa bira fe fanyi raba fɔxɔ ra. Na fee findixi fe hagige fanyie nan na mixi birin be.

⁹ Kɔnɔ i naxa i gbe raso mixie xa wɔyɛn fufafu ya ma. E naxan falama benbae xa fe ra, e xa gbɛsɛnɔnnɛya, e xa gere wɔyɛnyi Ala xa sɛriyɛ xa fe ra, e sese tide mu na. ¹⁰ Naxan yo mixie tagi isoma, i xa a rasi keren, i xa a rasi firin. Xa na birin kui a mu i xui mɛ, i xa a rabolo, ¹¹ barima i a kolon a na mixi mɔoli mu fan. A bara a yetɛ danka a xa tinxintareya ra.

Masenyi dɔnxɔɛ

¹² N na Aritema xa na mu Tikike xɛɛ i ma, i xa fe birin naba alako i xa n li Nikopoli, barima n bara a panige n xa jɛmɛ radangi naa. ¹³ Fe birin naba alako i xa sɛriyɛ karamɔxɔ Senasi nun Apolosi mali e xa biyaasi kui. E mali, e hayi na se naxan birin ma, e xa a sɔtɔ. ¹⁴ A lanma danxaniyatɔɛ naxee na won ma kɔnti ma, e xa e matinkan tun nabɛxi ra wali fanyie ma, alako e xa mixie hayi xɔrɔxɔɛɛ fan, e naxa fa lu na ki fufafu.

¹⁵ Naxee na n fe ma be, e birin i xɛɛbu. I xa won xanuntenyie danxaniyatɔɛɛ birin xɛɛbu muxu be.

Ala xa hinne wo birin na.

Soso Kitaabuie: Tawureta, Yabura, Inyila
The Holy Bible in the Susu language of Guinea (Soso
Kitaabuie: Tawureta, Yabura, Inyila Bible)

copyright © 2015 Mission Évangélique Réformée Néerlandaise et les
Traducteurs Pionniers de la Bible

Language: Susu

Contributor: Mission Évangélique Réformée Néerlandaise

This translation is made available to you under the terms of the Creative
Commons Attribution-Noncommercial-No Derivatives license 4.0.

You may share and redistribute this Bible translation or extracts from it
in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are
licensed just for use with those Scriptures and documents. For other uses,
please contact the respective copyright owners.

2020-11-11

PDF generated using Haiola and XeLaTeX on 22 Feb 2024 from source
files dated 29 Jan 2022

f1d08866-ea3e-5b9b-b506-e7690c5c61d2